

善
845.76
40-1

清容居士集 十三



清容居士集卷第三十一

墓誌銘

塔銘附

周夫人墓誌銘

夫人諱天福朝議大夫知瑞州周公諱應

合之女朝議大夫直寶章閣廣東經略安

撫知廣州冷公諱應澂之婦今湘陰尹名

頤孫之配世為龍興武寧人瑞州以學行

表後進論議惜許可湘陰拔童子科整敏

善自晦亟愛重之故俾夫人以歸兩家為

儒宗歸娶各得所擇眾咸曰在是夫人幼



靜慧愛書史工正書二弟始就學日諷誦
感茲相勵事尊順謹媿德儷義能使外有
不知潔豆籩冷昭穆靡密斟度恩意各盡
夫宗宜焉二子曰有泰有益保抱具訓輒
置筆札毋誑戲稍長約繩墨躬詰難嘗言
吾誘弟以婉替汝以嚴皆一轍也善宜亟
稱過不可得聞書種寧有斷乎年四十有
九以卒是歲大德癸卯葬仁義鄉下畬里
女六長許嫁周志行孫男三女二仲弟分
宜丞天鳳來京師楠與之游議門戶興植

婦道允賴數稱夫人之賢過時而弥哀於
是有泰實來致湘陰之命銘曰

有崇義閭維周之敷展世秉文耳受口濡
執彼閭儀來彛來祇宗承其和家安其慈
誦聲在戶嘉醕在廡叶于夫君婉德以輔
雙桐高岡附萼煌煌：擢榮舒秀穀旦用光
冽彼寒泉聿環義田昭銘新宮實曼厥延

方夫人墓誌銘

湖廣儒學副提舉上饒劉君德安恭甫之

夫人方氏大德唐子五月巳未卒卜祔先

墓不吉廼假葬于舍東越八年相中堂山
兆以吉告于是其子光以事狀來京師
謁陳郡袁桷銘夫人世居饒之德興幼特
靜好其父隱君常抱膝上祝曰吾家世儒
林當為汝慎擇婚對方是時上饒劉君某
以太學名輩待次寧國教授歸授徒山中
饒信地接武習進士業者率相戒師劉君
始出鄉隱君慨曰捨劉氏子奚適即德恭
甫也未幾寧國死德恭甫刻意振擢不以
貧窶自慊隱君念夫人憫德恭不自置察

夫人意色無吝悒卒俾以歸德恭甫壯歲
力問學預計偕生理靡密一不問夫人銖
黍化治手劇而身理之者寒暑曲備方丙
子兵變時德恭甫傾家貲以完護為急夫
人力贊之事定勉夫以仕且言曰盍亦少
慰我父意始伯姊嫁同里蔡氏蔡姊家侈
盛脫簪珥以服亟搖手弗受自是終老無
異飾生男子曰升老幼卒德恭甫晚得光
時夫人躬訓育慈嚴酌宜遠見光克紹其
父業焉始光游京師與余交相久話言母

儀悲泣不已余特以為母子至情不足異
夫賢其娘子孝其母閭里知事者率能是
及觀夫人之行與光終身之哀見焉將若
弗及則帷閣衽席色笑敦厚制事以理夫
豈勉而狀哉噫是宜銘夫人諱柔則曾祖
璋祖應奎隱君諱逢吉卒時年六十有三
子光瓊州教授今為中書屬從事孫男二
至元二年將治葬德恭甫亦即世于是以
某月某日祔銘曰
詩始房中維教之基采芣薄言和平以孝

考視劉媛溫恭且儀膏沐以韜絲柔是師
外防內完拮据孔艱孩無矯慈諸御閑
匪异其誠由衷允安興言遺思載沈載瀾
女史日微德音莫斃瞻彼墓田有賴斯泚
松岡豐融不震不圯廣揚嘉芬式裕尔嗣

盧母王夫人墓誌銘

盧氏湖北望族有諱仙者家涇州武強縣
金將亡武強為秦趙要衝歲蹂兵不息由
是徙家睢州兵浸南家益蕩析有子曰全
棕為奴于時全生子曰榮甫十歲審其父

北行斷髮仰誓呼曰兒不獲見父寧即死
行泣道中呼其父姓名道由真定日号訴
宛轉事益著里人憫之問所掠主無異辭
卒義以歸父子復居武強稍長學書算入
鄉校試吏為縣從事時錄事王君崇攝武
強審盧氏子孝感且吏能乃曰吾女舍盧
氏曷取配遂以歸生子四曰文曰仁叔曰
廷信季曰德廷信生始三年不幸盧君卒
夫人撫其四子力治桑柘甘苦淡垣屋庠
狹內外整截有限程督訓導過者無敢譁

事其舅姑以壽終至元十三年詔考郡縣
孝節于是河北道提刑按察司審盧婦事
不誣州達於禮部復除其家而廷信始仕
江南調泉州晉江尉辟福建行省掾又掾
江西叙遷為鄞縣丞復掾江浙未幾以才
佐海道漕府陳不便事就領金符為溫台
千戶歲運粟視往歲數三倍而夫人皆見
之廷信為鄞丞余時里居見其處事精核
剔植蠹利官長不能出私語上府陳白伉
直無隱嘗曰吾盧氏世為吏刻峭文致非

以起宗吾父有孝行迄不得上壽稍自飭
勵繫吾母之訓戒子孫為儒異我母慰意
焉至大二年夫人卒年八十有六祔葬于
先塋延祐二年天子孝治天下推賚存歿
而廷信秩五品得贈其孝奉議大夫真定
路趙州知州驍騎衛尉柏鄉縣子夫人亦
追封柏鄉縣君四年遣其子某來京師請
銘楠待罪史館若盧氏事誠宜書今誌也
無溢辭系以銘曰
林：生民男室女家禮失俗淪企而祿奢

維貞文人尚古不遐卓彼孝童木升斯華
承筐來嬪絕其榮夸四籬在戶蓬首苦心
甕牖屹城過者肅襟宅里表植柳槐森
頰弁奮揚滑甘具新大耋莫嗟淑德岑嶽
戒而孫子服儒以嗣教經展世踵武踵起
有隆墓田大賚告祉式時芬苾永保千祀

侯母王夫人墓誌銘

世祖皇帝以仁立國敦節申義丕變醇厚
至元八年時則有若太保劉文貞公議事
省中增益令式由是郡縣旌表綽楔槐柳

光于往史猗歎休哉楠由集賢歸里居錄
事判官侯玉踵門來言曰聞子嘗執筆太
史節婦孝子歲終必登于史籍玉也敢有
言玉故居濮州鄆城縣其先女直人曾祖
敬嘗為金殿前將軍祖林金人匠總管父
珪仕皇元為濮州儒學教授濮州不幸年
四十有一以卒母王氏生子女六人惇然
未勝喪吾母之教四子也皆身訓之其鞠
二女也必教以纂組化治嫁娶耕稼能謹
之以時家貧無生產而充然若有餘者繫

吾母之力也。玉兄弟既長，而吾母益能綜
核靡密，不知有缺怠。故仕者得盡心于官
政，而不仕者考謹稱里閭。玉之為婺州永
康縣巡檢時，至大三年也。母年七十有七
以卒。至是，婺居凡四十有餘年矣。後復為
婺之平準庫副使。婺之人知吾母行，若是
縣儒士，其實言於鄉縣。下于鄉，加考察
焉。由是，以達郡。復移于所居州。明于
禮部，然後悉如詔旨，旌于其鄉。敢以是有
請，傳永遠，嗚呼！劉向作列女傳，當熙明之

時則肅雍平和藹然有闕睢士女之行至
於末季則不幸不得全其生讀其書未嘗
不興嘆也孝慈耕桑帝堯表閭夫人生承
平貧能以禮防少老一節實聖天子休
養生息漸仁東德有自來矣盛矣哉能勿
書乎夫人名妙善父某妣某氏長子伯岩
勅授定海慈溪兩縣舡官次某不仕幼
即玉也女嫁某氏銘曰
勵其躬訖于逢慈儉勤壽考終表華楹帝
堯功過者式報媿豐

劉夫人墓志銘

嬪人之事舅姑有從其令者也若近矣莫
知其心焉有屈體承色先事以脩逆志以
求其得謂之孝歟或曰是知及之孝其中
有疑焉今之為舅姑嚴重則生畏不能
以洽玩弛則生怠近於瀆閨門之訓厲
以失之而容忍者於教乎何有在易之象
曰家人嗃嗃婦子嘻嘻我於郝君鹽使從
之夫人有取焉夫人姓劉氏河間人父
諱鼎母牛氏夫人之姑李嘗祝香以告曰

願吾孫子生悉如劉婦噫此非出于令與
知也孝根於心怨咎莫知旻天中野且悲
且懼若婦人貞靜其誠慤顯著一語以盡
茲其為孝也大矣夫人事夫之寡母夫
人一本無人字之孤侄有思愛鹽使病末疾歲久
不愈斥竭簪珥佐醫藥教子志善能植立
兩見為監察御史至治二年某月某日卒
年七十有二明年二月某日祔葬於西山
之祖墓楠往銘鹽使君矣今御史復請銘
夫人諛溢辭事史官所大戒嬾人事不出

閭戶以孝養為飭躬本考其姑嫜之言是
宜書銘曰

有言聞：有儀珊：視其寒温靡覲愠顏
從姑立宅弗愧以懌繫尔後人以永作則

韓夫人墓志銘

中原韓有二族居會稽者為安陽居廣信

者為潁川龍圖閣學士無咎公師表一世

其子仲止一本作正克紹家學搢紳號二韓父子

而廣信別出一族曰侍郎公祥字履善常

鄉公補字復善嘉熙中士類稱為二韓兄

弟楠族祖正肅公持節江東辟入幕府在
後省復荐為國子官人皆曰正肅善選士
二韓公聞望駸乎與潁川相並盛矣哉
天運合一衣冠家漸滅幾盡江浙閩蜀大
畧相近余歸老里閭有儒生踵門以告曰
容徐父子祖母韓夫人無為大夫諱裡之
女^大夫二韓公之親弟也自夫人歸徐門克
持其家事姑以孝著待夫之弟妹助裝以
有室家其相夫也卻金以成美夫官建寧
僚屬有不孝其母者夫人引喻廣譬能使

其妻訖事姑以禮訓子舉前史言行時刻
畫故事人物以佐警戒故其子孫能俱守
家教容又言曰徐故廣信大家刑部侍郎
諱元杰實容從曾祖栢聞侍郎公侍講筵
于時史丞相圖起復百僚皆進䟽理宗猶
豫不決侍郎獨微言曰邊事漸寧從戎以
墨線失國體丞相誠經濟老其才以用未
晚也丞相聞是言憮然曰嵩之不得起復
矣夫人之舅諱卿子朝奉郎權知嘉興府
事其夫諱忠甫終廣德建平尉夫人之曾

祖大寧奉議郎知徽州婺源縣妣諸葛氏
贈宜人祖貴玉贈朝請大夫妣端明汪公
達之孫女男一拱辰將仕郎信州路永豐
縣主簿先八年卒女一順正適祝士貴孫
男五宜容宅安寶孫女四卒以至治二年
享年八十以泰定二年某月某日葬於某
山容不遠千里而來謁銘秀植整足以興
植使世家皆若是其曷有憂乃為銘曰
亭：兩家久為舊門服習懿德克紹厥聞
幼工女史粲其纂紉亦游於藝靡非不究勤

母目既盲舐膜還明來嬪于徐事姑益精
奉脆擇甘順其性情不侈其長不夸其盈
訓子督孫雅言諄々龐眉秀姿儼兮淳真
官族日圯內教莫陳吁嗟夫人表茲堅珉
定水院禪師塔銘

大雄氏以已說判三宗禪學汪洋廣博言
意承接絕去文字稍契入輒証為知道小
智大點相煽以自高律教廢棄食不知耕
居不知工恣情於無畔岸而道益以昧惟
妙源師獨憂之自嘉定十七年受具戒即

方明本心久而日不耐塵勞心曷以制願
習賤事以調御寓本州天寧寺歲大飢赤
足踵門以化後始歷清職曰吾得無愧名
教矣其師愚心持正議不肯下宰相吳潛
潛怒繫獄辱之退居精舍獨侍側辨難率
有疑義愚公啟機以示曰汝今太平矣愚
公住徑山即俾首率僧衆愚已老學子林
立寮下析微統宗愚喜力贊之主平江薦
嚴內外事不一廢舉鼓山國清辭不就主
泉州水陸院治若薦嚴而俗士益信慕悵

然曰吾寧久是攜錫以歸楠先曾大父太
師樞密越公功德院曰定水伯父賓州先
府君處州議曰寺缺主者善趨謁迎奉吾
兄弟不受能以寂照解脫為義則庶幾冥
福源公行望高使力請必不讓以素所往
來者通意乃欣然以來楠時年十三歲或
問曰吾儒性善與佛所言同否曰同感物
而動漢儒失之由是有不同焉後乃曰儒
釋二教分別有異在治人治心治人在五
常治心在四大修五常治人之本修四大

治心之本道微世哀誠得一人焉不可得
涕淚交下謂楠曰祿損則福益盍慎諸布
衣鐵衾終日尸生語徹機迅奔電絕壑不
不可制伏稍斂戢則瞬息在几席禪人仰
之四方士尤宗之精於詩故宋名士喜之
然不肯表襮舊築居於越之雲頂將終願
解定水以歸且命無建塔無火化以任其
壞其徒不忍卒埋是山以至元十八年卒
壽七十有五俗居象山縣姓陳氏為僧五
十有九年銘曰

道契於文卮言以宣由簡速超悟者日繁
空浮變騰若火燎天服奇食珍謂合自然
師寔已憂榮戚靡覩或逃于谷或伏于莽
惟大雄是遵唯古德是祖機以峻傳言以
戒輔通黜興廢道曷敢替幽扁潛珍戶屨
屬係彼昧其承卒黯以遊昭銘授徒勿圮
勿翳

延慶入法師塔銘

四明法智大師以天台教旨經緯導達學
者謂為中興南湖實講貫舊址踵主其席

稍不厭衆議此言病交集歷代承接皆有足
稱道至師居南湖千口無異詞師名善入
傳姓世居定海大蓬因法師見異之淳祐
十一年與半山彬師俾受具戒游諸方辨
解究詣客東掖山著教家四書掇會執約
不以文字溺泥指畫勤懇從者樂其易簡
初佛光法師居上竺提其徒悉使出門下
於時有善良師與師相講習各植立不肯
和附師與良議曰我師大蓬兄能嗣之願
再拜以嗣良後嗣圓覺頑空師而師卒能

昌大蓬始與謁南湖後首教生主赭山東
臯世忠其說以角立為大病支離為末流
泛不溢辭約不厓絕禪人士子咸傾仰之
興仆復侵安衆靡懈泉南僧素宗禪學慕
師德重所以請法智之學行于東南六十
餘州至是入海嶠人益竒之至大年中詔
宣政行院慎採選勿阿意貪倖集議者曰
南湖缺席捨師孰能遂以昔日所傳授者
溪省察啟空假破建一性明靜而互議交
毀訖忘于言大蓬果有聞于世崇本誓志

師于是有成焉其凡見于修植施於人事
今不復著錫號惠教弘教法師而自號曰
秋虛延祐年五月二十有六日示寂為
僧六十三暮年七十有八化於城南頂骨
得舍利葬法智祖庭而以爪髮歸東臯冢
間之精舍至元間楠納交於東臯訥若不
能言聆其坐講則汪洋罔詰秉行潔清癯
容儼修粹然古德有足興起弟子大倫正
道等來乞銘乃為銘曰
四明之興匪事於言橐籥萬殊貫於心源

如水必東如矢必鵠末世濫觴語益以瀆
佔畢究鋪千緒億條會歸一歧承宗紹流
不希其逢謝彼翕訛矢心囿終後歸南湖
振揭初說曰吾師有傳茲道不滅弗蔓其
根弗瑕其璞癯然蕭閒廓以恬泊世教日
淪躡雲徂高著尔懿德我銘用昭

天童日禪師塔銘

紹定辛卯蜀破士大夫蔽江東下成都大
慈寺主華嚴教僧之秀眼率弃舊業以教
外傳游東南若痴絕冲無準範導達後進

表：名世者皆其門人而範之成就益衆
天童師其一也師諱淨日號東岩俗居南
康之都昌姓廖氏幼歲喜誦佛書解大義
常食蔬果以自持年十五告父母願為浮
屠氏明年祝髮于廬山香林訪道仰山石
霜遂入浙見冲師于靈隱越二夏不契乃
登徑山見無準師範大許之語在傳道錄
後見西岩惠于天童惠無準師大弟子其
提示與無準無异危機敏鋒迎拒莫覩風
止水息真然帖順遂密契其旨率服從之

俾守藏室後開先無文璨屈為第一璨亦
僧之後杰由是譽聞益彰宋景定某年江
東帥汪公立信慎許可推以主圓通咸淳
某年江東漕使錢真孫俾兼領東林至元
壬辰主育王三年歸隱雪竇大四年集
公議主天童師之行峻潔以完語氣溫和衆
益得以親納其徒俾明徹復性不侈於言
解其蔓惑處于世若無所施為遐邇向慕
傑閣銅象無踵以至而于天童功最著久
居東林化俗警衆民爭繪以祝故其興天

童廬山之民奉質以助尤夥生宋嘉定十
四年辛巳終至大元年戊申年八十有八
僧膺七十有一將示寂戒其徒書韻語以
示曰天為蓋兮地為函吾奚為兮塔與庵
灰吾骨 山阿言已矢兮勿銳越二日沐
浴端坐而遊其徒奉遺言以化齒根不壞
遂歛藏于西岩之清風塢噫耆舊日淪乎
慙恣蕩甚于世人不勝歛靡然頽瀾莫
有障室觀師景行豈泚其穎今弟子在浙
東西江東西若干人蠻溪嶺嶠承師之教

亦可勝紀如砥等來請銘：曰

七情蕩摩約性返源喻以攝持匪夸浮繁
末俗濫觴競立隙艱眩一駭百莫執其凡
性本湛虛分別則二不以解通不以思礙
寂非有存感乃隨義達摩之功空其所空
後人馳騁庸失元宗空不假為茲惟用中
蜀學簡易師承其風開盲振瘖發機以示
云彼摩尼非淨非穢徃安自然是謂止
鯢背長身從者如水丹霞嵌卞匪耀凡目
曰茲山之頽否極斯復敬者效翰罔不率

服小君來朝雲醜霧真顛幻身既空勿鍾勿
釁一氣孔周窮彼變易清風之塢石列五
色恍焉如存嗣者是式

廣思仁法師塔銘

師名可仁貫天台縣寧海姓胡氏號本菴
初歲游四明山居資福寺習天台鈔疏于
是我曾大父樞密越公治齊國楊夫人喪
見師秀整儼恪俾以從服闋吾必以汝祝
髮資楊夫人福越公以右司郎中歸台為
軍器少監尹臨安樞密之夫人周國陳氏

曰師宜祝髮矣嘉定十三年設齋上竺乃
得度于時月大師以講論訓諸徒願侍席
側大師與越公厚善謂師曰今僧徒聰敏
林立稍使一人預人間事得無害統體乎
由是在郡治間歸胡魯展治林嶂一以任
師在館中叅政應公儼猶未仕深器之曰
使師不為僧其問學當與士子並中書舍
人陳公耆卿時為臨安教授與師同里亦
曰應公言然越公入政府例得經院乃相
攸紫岩繩約四履峻危有階引泉有梯淖

醯除險帖石助高審面曲直周折獻秀紹
定肇工淳祐告成屈以主席錫名曰廣恩
崇福伯祖吉州大父尚書成諉以事因有
弛缺往侍諸父時見師承接曲盡而恃氣
凌轢者不敢出慢語至於楠四世矣噫逮
今五傳有不善扶植者矣而師亦四傳守
規蹈矩僅一二數兩家相視岌乎可惧楠
由鞠苑歸登塔亭謂塔主子鎮曰往事將
湮沒師之行業不可不紀其徒曰是在太
史師以至元十七年某月某日入窆僧臘

六十一度弟子二十有
人有詩集若干
卷大澤大雅相繼主是寺凡四十年規約
散弛今有子堂子鎰子鎮子金子真猶能
知師遺事下是不復解其寧有不哀也夫

銘曰

維大雄氏內寔外修不偏一能用彰以周
在師敏通卒異其儔我：新宮百礎承宇
以其弥縫莫或敢侮智周行圓者年以輔
成之匪艱承之孔難大訓厥徒黜惰矻頑
昭銘以儆勿踰其閑

醯除險帖石助高審面曲直周折獻秀紹
定肇工淳祐告成屈以主席錫名曰廣恩
崇福伯祖吉州大父尚書咸諉以事因有
弛缺往侍諸父時見師承接曲盡而恃氣
凌鑠者不敢出慢語至於楠四世矣噫逮
今五傳有不善扶植者矣而師亦四傳守
規蹈矩僅一二數兩家相視岌乎可惧楠
由翰苑歸登塔亭謂塔主子鎮曰往事將
湮沒師之行業不可不紀其徒曰是在太
史師以至元十七年某月某日入窆僧臘

六十一度弟子二十有
人有詩集若干
卷大澤大雅相繼主是寺凡四十年規約
散弛今有子堂子鎰子鎮子金子真猶能
知師遺事下是不復解其寧有不哀也夫

銘曰

維大雄氏內寤外修不偏一能用彰以周
杜師敏通卒異其儔我：新宮百礎承宇
以其弥縫莫或敢侮智周行圓者年以輔
成之匪艱承之孔難大訓厥徒黜怕砭頑
昭銘以儆勿踰其閑

延慶良法師塔銘

天台之學其說汪洋浩博旁訓廣詰多至
萬言學者讀之其書謂由律以入則心以
攝持由禪以入則心以解脫元文妙旨約
以據要事以昭晰如瘖獲吐如盲獲覩其
為書曰十門指要說三卷指要餘論一卷教
觀宏立門分戶列貫穿出入莫窮其途師
以諸部証其義例條焉不紊示焉指掌其
為書曰教觀撮要四卷三千別說則其師
覺法師之言具在舉世尚同因省立異良

非尚于言也師名善良字子直號月溪族
姓朱氏定海縣人始祝髮淨居習律湖心
游杭之大雄師頑空覺大師空問不二門
所屬三諦三千其旨意與空合覺大師言
辨簡峻師入其室嘗伴守講席後游淨慈
訪禮禪師以古德語叩辨禪語瞬息眩晃
意師泥名相為可惑師徐曰三觀之旨不
外乎是禮謝曰其歸振汝宗集慶寺成朝
命選主席班從者亦皆精良晦法師主上
竺任可否師預是選講大涅槃經聽者雲

集師懸辨提機整暢理得然卒師頑空上
竺不能強也主禪惠擇陽報國藥師治平
戶倭日接別為堂以處篝燈星列咸曰是
宜繼四明矣歲既久卒以輿論主延慶至
元二十六年寺延燬爰舍草緝講論彌不
輒大德元年九月某日入寂僧臘六十年
七十有九奉遺骨歸于祖關稍居迤南湖
幼歲游信堂群僧誦聲接几席取其書讀
之斯解矣後來南湖覩其容和以莊其說
坦以明始悟曰先生語不虛矣歿三十有

一年弟子允恭來請曰公深知吾師吾教
有行業碑敢以請乃不得辭銘曰

天台之宗明性合理銖縷具別弊極口耳
以言顯道言曷有止若舟在川茫不有涘
若蓬繫風去莫以趾支離演文積沓縑楮
迷途具茨珠探濁水至藺以求允究厥旨
聚不滿握迹紉步跬解其桎梏一貫真詣
南湖之庭屨履纒，振塵一言聞者竦起
遺書具存毋敢訾毀昭哉是銘千祀勿圯

空山雷道士墓誌銘

孔子曰文勝質則史班固亦曰道家者流
出于史官豈其然乎老子為周藏室史酌
古今治亂成五千言致用以準易較其治
良不誣也噫為老氏者其知此與河圖洛
書聖人則之易書誠經緯也微言既湮傳
注門戶各立自勝易與書迄不能並士方
斷：然不可參錯進老子之說焉得力而
勝諸士患無恒心遇不遇命耳曠百世而
相感者吾得一人焉曰雷齊賢始予讀其
書益知其所以言病乎世莫知其涯也齊

賢所為書援據切至感厲奮發不蹈世俗
絕墨合神以窮變盡變以翼道申言廣旨
其于力誠至矣今知齊賢者不若是則齊
賢之意將終無以自表齊賢于書無所不
讀悉資以為是書者其道然也道散于九
流百家同歸而殊途唯老子最近然則易
老誠相表裏耶嗚呼齊賢之志予深知之
矣齊賢著書曰易圖筮通變議老子本義
莊子旨義所為詩文二十卷和陶詩三卷
齊賢名思齊家世臨川人幼棄家居烏石

觀晚講授廣信山中暨終也復歸烏石治
其寔而先表焉表曰空山雷道士之墓卒
時年七十有二番陽吳成季廣信弟子也嘗
曰空山先生承絕學于蕩裂繕刻志意却
甘茹苦光景變幻皆隱匿不道飛伏控握
愈眩愈遠道無有矣今遺書具在匪吾徒
私彰確者如是則行若藝猶其粗也陳郡
袁楠以是銘曰
入而不出神不可以物通而不塞用不能
以休膏軸御軸其行彌跋無適不宜曷問

其津生以道為樞死以天為徒有隆空山
泉流舒：矯爾後人抑華食實弗績弗雕
我銘是質

戴道士墓誌銘

予讀桃源記私竊以為慕肥遯有遺于世
者之說云耳後讀地志則沅南地今號為
桃源者不與王化通安食水土無君臣守
令之程節于徵需乎何有嗣後地益闢桃
源遂為壯縣溪洞增為十州今烏能辨桃
源也哉或曰州有桃源宮累聖蠲復山水

清湛其人惇厚直且信使能居之寧非桃源
源乎戴君道安和甫其人歟和甫成童辭
家為道士性疏曠無畦町其師王君文卿
器之俾遠游見開府大宗師于崇真宮隨
其委令風雪承給不少替請于人也事弗
就弗止而人不以煩避之處于衆也率退
以自持衆先矣而君亦跋馬以及之故亦
受制為龍瑞宮提點奉香于武當桃源性
不喜臧否遇酒嗒然以忘然不復失事故
職教者弥任器世人以記短長逐日影為

能事君不能且鄙耻較其得失是真無懷
尊盧氏之民矣豈唯桃源民哉往歸其宮
携酒邀父老遊白馬洞天洞近長磧山酒
酣援筆述韻語曰吾死必藏是延祐七年
還京師明年改元至治正月某日微疾以
逝年若干斥其囊資不能以殮遺言以弟
子李札謙領宮事和甫在崇真度弟子天
台徐信初厚禮翰林待制虞君伯生伴教
之伯生與予皆故家見後進傲誕不復與
語獨信初給事無惰聞論文獻道德嘗揚

悚不自置信初果能為請銘君斯無憾矣
某月某日葬是山銘曰

棄方利觚睚盱以趨何誕之日多朴莫能
扶瞻彼沅溪中季載圖其德弗雕其人允
符持觴養和奚憾之祛命也不尤卒為天
徒

通真觀徐君墓誌銘

開府元教大宗師張公由孫以元道贊理
陟降帝庭踰四十年其承次授受同流
一源固有支別故其弟子相傳多至六七

十人以文辭議論達國體者為之嗣教其餘彬々行能清整英發林立輩出或激昂自修則俾之挈綱振維往來京師山林間重其名教若是者寧不備矣夫開府弟子之最長者曰徐君余官翰林十有六年未始識之延祐四年開府年七十始來上壽閉戶不復出戶限邂逅予庭中若相避然者集賢大學士李公某傳詔醮崇真宮益避跡隱奧中集賢語開府曰聞高第在是願接顏色可乎強之見揖以退復辭其師

曰弟子歸山中不來矣願師自重至治元年
年專价走京師作訣別語衆咸疑焉未幾
訃至溧陽以夏五月癸巳化於僊源宮得
年八十有二于是嗣師真人吳全節率其
弟子為位以哭皆不勝其哀且以狀求余
銘維徐故士族祖某父某君名懋昭字德
明饒餘干州人饒為衣冠望郡宋端明湯
文清公丞相江文忠公善衡鑒幼獲接識
之由是弄仕譜為老氏學以其道游江淮
間于時焯燧連警百里土舍不相接獨澗

飲草茹以善勸勵俾崇信其法後皆化之
開府公入皇朝隨侍二載即歸且誓曰
釋老以募衆集施為能事叩門嚙鼻抑獻
笑且取誚吾不能若是當益貶損焉積數
十年作仙源觀久之復作神翁觀佳木奇
卉編緝墾治山林壟畝陂塘之利益充然
衍裕卒能遂其初言歲飢以餘食餓者不
乏則損直以售葛衣布疋十數年始一易
見者服之老氏之學力本自治退足無欲
其言黯以彰不知者以虛無釋之邈不相

涉矣夫不丐于外則必慎于內宮室蔬穀
絲麻丹漆之物燕興俯仰之節酬酢進退
之儀人之生不能以缺也今而曰吾無求
焉將何以取其世以役鬼神竊服食為道
吾不能知之不惑于衆則善于民者寡考
其自治則於吾道合清淨富強昔之時君
嘗師之則凡刻鵠者誠得矣夫何疑焉余
嘗侍開府公言語絕臧否者而謙默而簡
退與嗣師游弥綸損益將以行其道是非
家庭之教績業績素能若是乎盛矣哉大

德六年制授主常州路通真觀皇慶元年
制加保和通妙崇正真人二觀亦以璽書
尉鎮焉以是年某月日葬某山開府再傳
曰李立本陳義高義高明朗通豁器行瓌
特贈粹文冲正明教真人皆早世今以次
傳者曰余以誠何思榮吳全節孫益謙李
奕芳毛顓達夏文泳薛庭鳳陳日新餘若
干人將葬開府惻然曰吾弟子早從吾游
其亡也不宜以薄乃命奕芳歸蒞葬銘曰
林、生民厥初一原帝霸肇分兵刑日嚴

維元元君治道不繁節約寡求罔有僭貪
崇觀超居導迎泰和絕色屏味日用不頗
後侈恠竒風揮電訶造舟構臺百靈迄泚
赫々大帝尊企清淨元風恬寂守貞自正
溫々開府不夸不佞于帝左右淵默無競
在師承之儉以繩之派々自營率克興之
道合古初訖莫我病銘昭真宅是式是証
陸道士墓誌銘

道家者流以清靜無名為本時王以其宜

于治國靡然宗之傳世益薄長生之說多

卒茫昧不復講今世所傳惟法藥與術藥
術又鄙棄不用而法僅傳謂其宜于水旱
疾病通得而用之也余行天下與方外士
游率不得一二蓋其傳受訛缺浮靡恣蕩
攝思握神罔不知所以而其祛役禁制按
圖以求叱咤瞬息欲通靈于肝蠻不可得
也噫其教若是而為其學者又皆不自植
立可哀也矣余居近東岳行祠有陸氏者
掌其祠有年矣其四世孫曰頤真初歲識
之儀觀秀整淵乎抱道之器與之語慎重

不伐悒悒然欲求其師未能也日尊所聞
抄綴盈篋樓楚公諸孫坦好黃老能以參
攷損益編簡往受其說遂為弟子後聞天
台桐柏山有靈寶法福聖觀道士曹君為
正傳往師之又聞維揚潘師得白真人上
章法遠游以受然不自表襍處群衆益簡
默丹經筮書星歷孤虛之術悉究詣旨要
晚得末疾漸草呼其弟子陸宗元張蒙
生語授受本末且曰我死必得表內翰誌
文以信後是死為不朽當葬吾于先母之

墓側墓在翔鳳鄉白日紫虛觀右紫虛樓
君所建實繼其事曾大父軾大父景文考
斗瑞生宋開慶元年歿時年六十有七實
泰定二年七月某日也葬以某月日其弟
貴和實來請銘哀其志嘉其勤而卒不逢
非命也歛銘曰

握奇制氣超鴻濛約束萬神驅霆風物無
疵癘元感功秘圖靈籙昭群蒙後生棄慕
甘盲聾嗟哉紫虛憂坤二喻江越嶺異一途
死生晝夜在反終不坦其化輪旋空恍兮步

虛出雲中有縞之鶴來城東

清容居士集卷第三十一

清容居士集卷第三十二

行狀

翰林學士嘉議大夫知制誥同修
國史趙公行狀

曾祖伯洙宋朝請大夫知南外

宗正事贈金紫光祿大夫

祖師雍宋朝議大夫直寶章閣

考希聖宋宣教郎史館校勘

公諱與熏字晦叔宋燕懿王德昭九世孫

高祖子英宗正少卿避地南徙紹興間為

台州黃岩丞家于縣之西橋至其子孫遺
育蕃衍故今號西橋趙氏宗正有孫師淵
字幾道官至太常丞為朱文公高弟文公
述通鑑綱目條分例舉整齊芟奪迄于成
書皆太常所定其言理學蘊奧心受耳屬
精析該邃非若語錄所傳剝臆謬妄東南
後進咸尊太常與黃幹氏並于公為伯祖
公少美儀觀音吐清徹讀經史大義必本
家訓弱冠以易入宗學登咸淳辛未進士
第用積舍法教授鄂州鄂為楚上流歲備

武不懈公視邊將翫弛而咸淳士大夫率
耻言及事乃策諸生而問曰文武之用不
可偏廢韓范二公不以言武而失文曹彬
狄青不以清談而喪武文事武備豫然後
立時未幾王師絕江守以城獻公自念為
宋國族鄂先內附兵勢若破竹不可支而
歸道已斷絕不得返遂上書丞相伯顏公
言宋權臣賈某柄國十有五年脅威罔主
弃背信好事一至此今得冀如藩臣歲奉
貢幣願緩師以行成焉書未報而錢塘已

下寔至元十三年也公知南北已混復上
書丐返田里會大臣有竒公狀貌告于世
祖皇帝十四年遣使上駟來京師幅巾深
衣見于上京天子清問溫渥首詢其老幼
及江上事首尾其對復如上書所言特命
給廩餼以俟用明年奏言江南郡縣戶口
繁夥當以簡易治近歲有司急切興利殊
失安輯新定之意臣生長江南悉習利害
因條類為十六事以進大較以擇守令釋
征歛厚風俗為急而末復以存活趙宗為

請十六年入翰林為待制陞直學士復兼
集賢又三年遷侍得講學士預纂寔錄加太
中大夫於是侍講十四年矣累疏乞致事
歸里雖未得旨而不入翰林者幾二年久
之拜翰林學士自鄂之來京師凡二十有
七載由里居而之鄂也適三十年每恨乖
隔愈久冀一得請以終老邱壠常忽之不
樂秋風倚楹懷悲故鄉擁衾障袂聲出金
石非復以宦達為可戀惜而志迄不遂抱
病暮歲以卒大德七年正月二十有二日

也年六十有二積官至嘉議大夫公之為
侍講也言江以南括責營聚皆大臣與其
黨類私植貨累鉅萬願寬今年田租以緩
赤子宗世陵寢毀掘及移徙故宗室大姓
皆非初詔本旨乞正其私擅之罪
天子以為然又言迺者庚寅歲大霧四起
越翼日癸巳夜地大震地為臣道臣強則
震至正月甲辰西城就擒虎於象為兒為
金其著尤異咎在姦臣蔽權今已執咎而
宸斷未果願早正天誅以應變異上意

若微忤而終不以罪由是居家待罪閱三
月大司徒公自上京俾燕只干學士諭以
復職平章政事不灰木復為公奏逋負歲
積不能自養上曰得非指桑哥為虎者宜
令有司計逋以償歲別給帛粟餘勿為例
人益知世祖皇帝神武沉斷非真忤公公
天性踈達與人交緩急高下盡力傾引弗
避不為刻峭自高亦不復計得失成就故
始爭趨慕而間輒掉去訖無毫髮恨意傾
觴煮茗費盡即止危坐清論一不以靡密

缺乏廢其雅道歲時奠薦雖甚匱嗇猶豐
潔盡力如舊禮自宗正四世而下皆請于
朝而復其役族屬男女以及鄉里之俘虜
而北來者悉贖以歸凡十一人有張生貨
藥西關一日過之張死已數月矣亟歸視
藥券盡酬所負其家人不知也遂具以告
而歸之一士人伺公錫賜時謾言當買田
毫宿間計資與之歲久不至後亦不問其
受欺類如此同列有侮公為方拙暨死之
日朝衣或曰善士已矣各轉奠哭吊終其

歛事而同列亦悔昔日所侮為可愧往右
丞許公仲平萬意道德性命之學奮自飭
厲以文公四書為標準達官高胄皆俛首
承訓不敢怠公時至京師首言力行致知
近世率清曠自高言行若杻鑿不相入非
儒先本旨許公深然之至觀其平居處身
待人抑華仰實許公雖死而昔時門人親
聞其言者皆以為伊洛原委惟趙公為真
似益以知太常之學為可信至公為有傳
矣有詩文若干卷類聚藏于家初娶舒氏

御史中丞亶之五世孫未踰年而卒歛篋
中裝歸其婦翁不取今夫人史氏奉直大
夫知連州一之女生三男子長孟實以公
居 朝廷久特官為承事郎同知瑞安州
事孟賚溫州蒙古學教授孟賢以廕入官
孟實等欲求銘當時世有道以信于後俾
桐有述謹具歷官行事如右謹狀大德七
年七月日從表姪具官袁桐狀

推誠保德功臣開府儀同三司太
傅上柱國追封薊國公諡忠哲梁
公行狀

公諱德珪字伯溫姓梁氏大興路良鄉人
八世祖德成遼末以勇力善賞雄鄉里生
子吉不仕吉子伯溫金皇統進士官通議
大夫同知河南府事遂贈吉安定郡伯郡
伯孫牧牧子陟明昌進士官中奉大夫同
知南京路都轉運使事亦贈其父安定郡
侯郡侯有別墅金世諸名士日觴咏從之

游中奉髻年能以詞章相周旋咸器偉之
晚歲直節善政深自植立值金亡終老於
里生術為金承奉班祗候祗候生守信終
隆興都轉連使轉連生國禎終內藏庫提
點是生公後以公為左丞時朝廷特號中
奉曰通憲先生轉連贈榮祿大夫定國公
謚忠毅提點贈榮祿大夫安定郡公謚僖
敏公幼歲給事昭睿聖順皇后宮中竒其
器骨俾熟國語通奏對年十一太府長官
愛之紳其弟德贊同見世祖命相者閱二

兒相者曰後當貴帝頷之遂使從東平忠
獻王安童習憲令儀注年十四即襲父職
至元十六年升中書左司員外郎二十三
年遷右司郎中踰年復左司二十六年進
大中大夫總管大都等路打捕府仍領左
司是歲復右司二十八年叅議尚書省事
復遷中書二十九年世祖特旨拜叅知政
事成宗即位陞中書左丞大德二年拜平
章政事公未弱冠指即官宮省踰三十年錢
穀出入高下若誦諸掌四方奏請率面授

中書椽言某事當如律某當如先帝某年
所行極邊宗王急駟調發卒無所從其同
列拱手不能語公徐言軍用有故實泛索
非故事不可行執筆量劑退攷故籍無少
訛誤戊子歲地震北京世祖問今歲刑部
所報囚徒何煩多公對曰囚非犯刑罪特
以徵索羅織無所從納故悉為囚在獄中
上大感悟乃悉赦天下逋負京師供給繁
夥屢奏蠲復之漕運根本江南浚治湖堤
不宜使富民侵塞以殺勢議自公始選部

資歷吏不敢後先一時以事功自期者公
亦與一二執政議超常格俾自效方大德
初元成宗恭儉守成一繩祖武公亦以朝
政自任年穀豐熟四境寧謐廟堂大臣相
戒以清淨為治凡上書言利害歛口不敢
發自是希進者皆避匿後議相持既深朋
黨比進乘事間發浸淫於疑似之際會上
不豫遂出公湖廣安置踰年上疾稍瘳罪
一二幸臣急召公還鄉遂乘馬朝于京上
上問卿從何來公環視嗚咽不敢對上賜

猶饜命歸省其母諭以將再用至九日詔
復入中書時公已得上氣疾與家人向嘗
遠謫令得再覲上明白母子相完聚即死
且不恨何敢復有希進意遂却藥危坐謝
事某日星殞西南有光流室中是夕薨年
四十有六葬于宛平之樊村妻安氏今封
菊國夫人柔靜能家子一人某女三長適
納速刺僉事次適伯達某路都提舉幼適
某同知宣徽院今上改元詔錄勛舊贈公
推誠保德功臣開府儀同三司太傅上柱

國追封薊國公謚忠哲而公祖父亦復追
命為國公母夫人完顏氏公能承侍盡道
待二弟曲致恩意對賓謙不失禮自以先
謀種世科尤重儒士詢考安定別墅為圖
表章一時播紳咸賦詠追美其事侍帝左
右率領候意向獎拔士類至于決事占奏
惓款不讓而悉簡慤稱上意死雖十餘年
朝廷至今猶稱道之前翰林修撰知高郵
府張某次公遺事命楠演潤將求鴻藻以
表墓道楠與張侯曩同在翰林見一時行

事張戾以親嫌為辭公之弟德璋今益都
樞密昔為慶元判官時楠居鄉里得聆公
言行遂不敢以草野為辭然舊聞中原故
老嘗言梁斗南文采風度有陶靖節晚歲
志意後進爭慕企久知乃通憲先生也先
生言行在人口不絕方金將止時士族解
散漸盡暨獲平定推原高曾名字于荒碑
野塚之際皆缺軼無所攷獨梁公八世官
簿歷、可据德源深長通憲守儒之效著
矣至若公行事在史冊者不敢有私姑次

其出處大致使銘述者有考焉延祐三年
九月某日翰林待制承務郎兼國史院編
修官袁桷狀

翰林承旨王公請謚事狀

公諱構字肯堂世居濰州家譜云與中書
令同係八世祖某宋世為司農卿守鄆因
家焉故今為東平人曾祖某金進士奉訓
大夫滄州無棣令祖某以公貴贈正奉大
夫太常大卿考某贈昭文館大學士資德
大夫公幼歲肄業郡學試詞賦入等杜先

生仁傑深器之賈文正公居貞一見館以
教其子載與來京師時太保劉文正公王
文康公王文忠公持薦士權即辟為杖國
史院編修官丞相史公耶律公在政府聽
公上事言論接以賓禮耶律公復戒其子
以兄禮事焉至元十一年授將仕郎命為
真于時集議時政必使公預會裁酌之十
二年丞相伯顏出師諭江南公實草詔是
歲渡江世祖命翰林直學士李槃與公偕
行平寇擇儒藝之士明年春次杭州公見

董壽公某曰故宋圖籍禮器具在宜收其
秘書省天章閣翰林太常考集目錄宋史
異日必脩纂遂悉輦歸於朝十四年充應
奉翰林文字公辭曰少嘗受學於李先生
謙今先生猶教授東平實不敢先遂以其
官召李明年始受之十六年陞修撰凡制
誥撰述文康公必以命公丞相齊魯國公
和禮霍孫領翰林開司徒府授府司直世
祖詔大臣議道藏可焚弃公與議完救之
十九年丞相阿合馬敗齊公入相議選舉

更定法皆公手定遂授吏部郎中未幾改
禮部後復吏部而翰林制誥猶委公叅詳
焉二十二年遷太常少卿上方定宗廟修
禮樂而公皆從故宋所輦還者皆得補缺
二十四年出為江北淮東道提刑按察副
使御史大夫率公陞辭上賜酒慰遺擊奸
惠民淮民猶能言其事二十七年除治書
侍御史故相桑竒嫉公命與故平章魯公
卜忽木檢青燕南逋負公先馳駟會計薄
領迄無所迎合謂魯公曰公近臣某復在

言路相若苛責當受罪不以累公也未幾
桑哥伏罪二十八年調選江西二十九年
改翰林侍講學士三十一年世祖升遐成
宗嗣位分院上都制誥多公次定徽仁裕
聖皇太后知之特賜楮幣七千五百復命
撰世祖祔廟謚冊攝司徒以導禮大德改
元纂修世祖實錄陞翰林學士二年參議
中書省事右丞相引見於柳林上問昔從
何人丞相奏是和禮霍孫官屬真儒者昔
奉旨參用儒生今故用之時上初位勵精

文治年穀屢熟海內熙洽公從容二相間
以薦士安靜為急務後數年來執政希合
生事將檢括增羨首以其策行東南公卒
不肯附稱疾納祿幾一年七年朝廷更改
獨公無所累歸里九年授濟南總管禮法
自持嚴而不苛凡為民害者悉除去丞相
谷次罕見判公所申牘咸從之十一年太師
潘陽王等奏俾乘駟造朝拜翰林學士承
旨復修兩朝寔錄特命贈公二代公言臣
本儒家遭逢四朝先世皆潛德里士大國

美謚懼無以稱以臣所居官授之誠以為
過今群臣封謚下太常必由翰林議官品
臣首踰越將無以服衆今上時為皇太子
常詢翰林老成必首姚燧王構手以酒賜
之是歲尊謚祖宗公撰太祖睿宗皇后謚
冊賜楮幣萬緡正月撰皇后冊文相侍中
讀冊至大三
年以疾薨公在朝廷凡^踰四十
年凡累朝憲章損益能悉舉源委翰林述
作自為編脩時已預撰先賢文懿尊酒叙
論咸有据依欲輯為臺閣舊聞而事莫遂

崇拔後進雖未識面汲、稱許不絕口性
剛直有不善必面責之有文集三十卷藏
于家子士熙今為翰林待制竊惟聖朝褒
錄臣下見於令典謹撫其居官行事請於
太史上于太常至若居家雜儀治民遺事
悉不敢次第延祐三年九月日門生翰林
待制承務郎無國史院編脩袁楠上

李司徒行述代作

嗚呼我先公之亡銓時年十有三遺言言
懿範誠不盡知雖知之亦不能盡詳少鞠
于趙氏外家外大父諱某為南京同知先
夫人嘗泣語銓曰汝父沉靜寡言篤志嗜
古卓然遵聖賢言行為鉅範強之仕弗肯
仕凝塵敗席家事靡密弗顧疾革猶執卷
矐然若有思空約彌甚間嘗曰我幼孤長
兄樞密都事教我撫我繫汝舅之訓汝舅
生三子長都事君從革次樞判君從謙余

叙為季生兵革中我先君每誨吾兄曰家
世朔州罹亂離朝夕習騎射今邊宇寧謐
諸兒宜守儒顯親母刻木吏為也都事受
其言朝夕以詔二弟俾從學於九山李先
生徵吾詎願不仕非其道不可也銓幼不
能必其成後其語諸又曰大父之墓在朔
州地遠不能至攷其事則有紫陽楊先生
之誌在戒其無忘焉不幸某歲卒年四十
有一葬于南城柳村之原先公既卒家益
困太夫人挈于外家化治銖粟率資以教

銓稍長痛自感勵有以其名聞於世祖皇
帝詔習儒業入國子學師許文正公焉後
直省闈三年出為彰德鐵冶提舉又十年
同知歸德府始得致養于母夫人元貞元
年過汴梁將歸京師不幸夫人卒於汴卒
時年五十有八奉柩歸葬於柳村相其地
水齧如不可旁祔乃卜于西山金河口田
峪之南得合葬焉冬十有一月某日也元
貞元年為翰林待制又三年轉廣平等處
鐵冶提舉改工部員外郎承檄視屯田鴈

門雁門地近朔州銓思念吾大父葬朔州
在鄯陽灰河西一里今六十年榛莽不可
攷有楊先生英誌在雖無能知吾以誠求
寧卒使無知哉翌日驗誌徵旁近卒無有
哭走於野有老叟年八十餘乃來曰李府
君葬時吾嘗治畚鍤於灰河今西一里隆
然者其墓也銓泣且拜得封崇以識焉楊
先生之誌曰李君大父諱彥宏由彥為名
者十八人自彥而別為玉者二十六人其
諱記者銓大父也我先大父之幼子也

都事有子曰某提判君無後銓由生奉都
事而下皆合葬於西山而灰河之墓始樹
楊先生之碑推大父盡後之德遭時隆平
非若昔時之永隔歲時省墓則力猶可至
也楊先生之誌又曰大父為山西西路課
稅時耳目所逮纖悉必陳於長官有以權
趨牟利即峻拒絕後患或言郡縣始安輯
宜用重典使不犯輒而折陳白非忠厚恤
民本旨先公之誌翰林承旨王先生構則
曰拱璧駟馬流俗所恃孳者先公無生心

也銓無所肖似自工部改授朝列大夫楊
州路同知臺擢為監察御史四年少中大
夫河北河南道肅政副使五年移淮東未
幾嘉議大夫常州路總管不六月召為叅
議中書省事又六月除禮部尚書復四月
轉燕南河北道肅政廉訪使改昭文館大
學士中奉大夫治書侍御史今上皇帝推
賚存歿于先得贈大父資善大夫司農卿
上護軍追封冀國公諡莊順祖妣王氏翼
國夫人考榮祿大夫司徒上柱國追封翼

國公謚端敏妣趙氏冀國夫人嗚呼銓無
所肖似承藉先德先夫人之訓歷歷在耳
願因朝廷光顯之寵求文鉅公表於墓道
俾李氏子孫後有攸考謹再拜具其事于
右端敏公諱從益銓今為翰林侍講學士
娶孫氏封冀郡夫人合三房孫凡幾人長
某延祐四年九月日男翰林侍講學士中
奉大夫知制誥同修國史李銓狀

資德大夫大都留守領少府監事

兼武衛親軍都指揮使知大都屯

田事贈推忠贊治功臣銀青榮祿
大夫平章政事澤國公謚忠宣鄭
公行狀

本貫澤州陽城縣屯澤陽鄉屯城

里年四十七

曾祖珪未仕

祖擧故忠昌軍節度使

父鼎故鎮國上將軍湖北道宣

慰使贈銀青榮祿大夫中書右

丞謚忠毅

公諱制宜字扶威澤州陽城縣人大父節
度當金危亡時以智略抗慨衛拯里社興
屯田陂池之利年不展用是生忠毅公提
天師勅羗蜀絕襄漢竒勳冠勇功攻表焯
官譜始著公忠毅公之嫡子也方勝衣時
忠毅携見於世祖皇帝特視偉之命從大
臣習給事儀忠毅過寇死難世祖震悼乃
即授金符襲平陽太原之軍而成鄂焉公
盛年受殊數益矜謹自重控伏將士帖首
無撓犯湖廣行中書治鄂戎帥策馬進退

承教令縮蹙不自給獨公爭器重傾下鄂
守缺長執政俾揖治日坐決文武兩府郡
益以理凡數歲訖不除鄂長官十九年詔
治樓舩有事於島夷江澌地不足居舩官
城南有何家洲、爽廣多居民中書行令
遷洲屋仆徹墉瓦聲汹撼白日交走驚泣
道上公行相旁近地與洲無異即趣還其
居洲民事持牢醴拱謝拱謝公揮手曰安
民吾職也何職謝焉鄂多火災連晝夜交作
或言城中隱姦利羅疑似者急治火可止

公言咎在火政不明火未絕而復誣構彼
何生為遂率軍士約立渠巷俟火所未至
通徹其道火是日乃止有盜私立部號伏
近郊日暮剽劫負擔者訛言將入城索之
不得見數男子從城外來促數異顧命縛
之省貴人曰得無以疑誑誤將出之明日
過城東門見一少年乘白馬行且色動公
呼曰汝賊也汝貌良人也何作賊不速言
當訊汝少年叩首吐實復信宿日所捕亦
同款一郡大驚二十三年徵入侍中明年

從駕北征願前敵效擊上曰鄭制死惟一
子在宜勿使擊復請戰乃命從太師以行
師還詔侍膳殿中加懷遠大將軍樞密院
判官春駕如上京院留母從公曰年少宜
服勞願以偕行上愛而勿許二十八年超
拜湖廣省叅知政事是時鄂大臣集括歛
為竒功上怒錄其家公入辭上曰而父死
賊難賞不及于汝今有盜臣貲財僮孥
貯于鄂者互擇精善自取公對言某臣家
人皆傭穢不可詰受之雖無汙然跡其由

來寧無汙乎上益竒之鄂為舊治土俗厚
薄悉周知其隱蘇枯剪強翕然至和上知
其能賜中金五千兩間歲具口奏臣向留
鄂治兵臣母知臣年未更事乞臣侍陛下
宿衛今不以卑鄙預外政府朝夕思念不
勝任敢昧死以請復徵為內臺侍御史安
西地歲牧焉牧人利曠遠率併入旁近世
業民數訴理求地持輒不下命公乘急傳
治其事覈地得三十萬頃考籍于官餘悉
歸於民三十一年拜行樞密院副使院治

衡州公統軍入衡下令不得入廬舍營部
擇便地定井灶食罷畢發至暮輜列就次
道遇雨卒言互止頓舍休憇公立雨指畫
訖一卒無敢宿民居道旁市井人雜語不
知為官軍也湖南地介江廣賊負險煽昭
賀聯絡廬陵諸屬邑大軍至即守固不復
出歲一捕寇率害善地寇伺去復嘯集如
故公至相阨塞雜耕守戍據其出沒明語
歸降者釋弗殺逐殲其首長荼賊譚計龍
匿兵器有異志立捕得之其弟昇貨以緩

事公趣輸于軍卒正其罪武宗皇帝改元
復別置副使一人與公同治公謂官溢常
員先置者當罷入授大都留守領少府監
未幾兼武衛親軍都指揮使知大都屯田
始進階資德大夫公幼熟內府營繕工巧
供給祠祭之屬能通達緩急終歲事無曠
收至大宴席刀匕樽斝必命公董領以重
其事大德七年地震太原平陽公承命往
視且言河東罹鉅創聖天子出粟幣以賑
活之設一不及是負明詔死罪萬一何可

道乃躬入里巷傷殘羸餒悉疏錄以給有
市官利征商詭言某地少災不宣官廩征
法宜如昔無所損公怒曰幸災困民、何
罪且汝計征入何補縣官入言于上復其
地三年公天性慤厚上宴大明殿獨侍立
不惰命之飲再拜辭上察其意賜酒二壺
使歸飲于家事母蘇氏至孝特封潞國太
夫人以寵之錫賚無虛歲復加賜海青俾
入禁園尤號為異數大德十年二月五日
以疾薨年四十有七其葬在某縣某鄉自

自公少時已知自貴乞名於王文忠公王
見而器之遂定其名字忠毅以死事顯故
公彌欲以忠孝勉獎通敏有持守其居鄂
十年善政藹著至今父老言鄭公真清士
非它人比至守官靖政不以喜怒害事謙
抑自晦中朝士大夫則曰鄭公真吉士也
配可烈真士氏丞相孛羅公之女子鈞今為
懷遠大將軍武衛親軍都指揮使至大更
元特贈推忠贊治功臣銀青榮祿大夫平
章政事澤國公復下太常定謚曰忠宣謹

其歷官行事鴻筆碩彥得以取擇謹狀

榮祿大夫大司徒特封饒國公吳

公行述

本貫饒州安仁縣開興鄉壽標里

公諱克已字祥甫維吳氏遠有令緒秦伯
以至德讓嗣逃于吳周受殷命大封同姓
而秦伯胤系因食采吳地子爵不絕周既
衰吳越楚爭王吳為越所債子孫散處江
湖間因以國氏夫差六世孫苒為秦番令

有德於畚號畚君漢次萬功封長沙而廟
食畚世不絕宗庶蕃衍凡占籍畚者悉祖
之安仁吳世儒家宗淳熙間有從朱文公
講學曰某皆其譜牒公之曾祖岳祖夢旂
養潛東幽丘園晏如也父鑑服儒業言行
矩範閭里是否能持平善諭俾率初後皆
尊信之幼書教子誨之曰學非干以祿遇
不遇命也故公受其訓而行之幼靜默寡
嗜好達生養和非仁義之言不言其居家
也中絕喜愠躬行以導之不逮者微語以

警之其處於鄉也肅然如有容暴者化之
以慈有為不善者輒自勵曰得無吳公知
我所為乎幼督之以學壯獎之以仕稍有
能輒譽之其成就也怡色若己得年益耆
賓客造戶無惰媮酒至愈莊夜分猶危坐
治績悉人皆曰吳公有子全節為玄教嗣
師摠揖江淮荆襄道教崇文弘道玄德真
人其好賢持其身常念若不及繫家教所
致推公之德視其子則猶可企也延祐年六
年五月玄德危篤上京稍以待罪集賢偕

行公薨以五月丙辰訃至玄德晝夜哭不
絕泣且曰全節不天疾驅以歸顧述先公
之行以聲其哀恸謝曰述德叙行互在門
人佐吏敢辭則又曰猶子善辱與子游其
何辭謹按玄德真人幼慕老子道年二十
從大宗師開府張公入朝奉祠宮間歲告
歸省成宗皇帝憫許之大德八年公與夫
夫壽七十上賜公上尊加帛俾乘傳以歸
大德十一年特拜翰林學士中順大夫至
大三年武宗皇帝隆孝治恩賚中外臣由

是超拜榮祿大夫司徒繞國公配舒氏饒
國夫人而公考亦追贈昭文館大學士資
善大夫饒國公謚文靖妣陳氏饒國夫人
立德奉制書以歸延祐元年公壽八十天
子遵成宗錫賜如故事延祐四年復降璽
書復其家命守臣王都中表鄉曰榮祿里
曰具慶立德築公所居堂曰晚香曰天爵
翰林侍讀學士元公明善記之矣曰齊老
則因宋孝宗所書扁以徵其實曰樵隱公
所居自號以寓其冲淡之意焉公壽八十

有五將以某月某日葬於鄉之山田原子
四人長詢次誠早卒次玄德真人次全義
女若干人孫男若干人善集賢修撰彖副
才致孫女若干人曾孫男女若干人始善
來京師從游嘗出大父手書誠善制酒力
纂述勿愒玩以自弄又誠其叔父持敬存
誠為應天事神之本日承君師母以我老
為辭幸未弃昭代嘗惕然深念曷報稱數
數道途非所望假我死何憾也水寔于山
屈曲演迤遇順而始達非偶然也養深用

嗇累遠益振于吳氏有攷世胄顛覆抑其
所發者誠過耶嗚呼吾於是見之矣楠也
辱再世之游身受自矚向為史官錫命享
醴之禮嚴詳于記註博史純孝贊皇風闡
鴻藻有自來矣遂不克讓奉於太史俾有
攷焉延祐六年七月日具官袁楠述

清容居士集卷第三十三

清容居士集卷三十三

表誌

西山阡表

嗚呼我大父嚴州宗寶祐五年丁巳六月
七日庚寅即世年六十有七後六十有七
年是爲

皇元至治三年歲在癸亥

聖天子推恩文武錫命有秩不肖孫楠以
從臣遂得贈中順大夫上騎都尉會稽郡
伯大母令人王氏會稽郡君是歲五月丞

相忠獻王薦於

英宗超拜侍講學士泰定元年又贈嘉議
大夫禮部尚書上輕車都尉會稽郡侯郡
君加會稽郡夫人嗚呼楠生七日而母史
夫卒先考處州嘗語曰汝外敷文轉運公
諱賓之淳祐十一年辛亥歲秋八月病且
革嚴州調疾候所命于時汝母年六歲余
年七歲即指曰吾女以中外表願奉公幼
子大父謝且立曰幼子獲爲越忠定王孫
婿他日生孫寧負吾兩門哉楠泣受其語

以識桷髻亂時喜聞遺事於是越公賓客
子孫宦途著仕而大父遊從咸在嘗語曰
越公為京尹十有一年囊括隱伏抑強振
惠繫汝大父密以贊外若常布使世不知
有弟子名字其居越公喪盡喪禮喪除廬
于墓不入城府者三年非唯鄉人言之外
州士大夫能言之退攷其家乘曰初補承
務即監無為縣襄安鎮知建寧府浦城縣
丞越久待從陞政府而執政求外仕令不
許故再任祐神觀紹定四年越公解機政

始得授江南東路安撫司幹辦公事端平
二年以侍養請於朝優許之充沿海置制
置司機宜文字淳祐七年通判嘉興兼尚
書省提領田事所檢閱乃曰吾得以仕矣
治府事無田難圖圖以空悉以越公尹京
法治之郡守謝不能提領戶部財用史宅
之悉以括諸司田阿媚奉上具籍百餘萬
用戶部印入御府而以副帙置三省始愀
然曰吾不可復治乞歸三年授陰江軍力
辭以疾後戶部果督責浙西諸州虛籍守

臣爭納告乞丐罷言諸司田皆朝廷舊籍
欲入虛籍則宜蠲舊籍未幾宅之死始悔
罷而副帙在三省者國止散落民間言利
大臣深信之卒爲東南害十一年知嚴州
寶祐二年提舉台州崇道觀積官至中散
大夫鄞縣開國子先處州登朝贈中奉
大夫再以登極恩贈中大夫維我大父訓
範嚴密居家治具畢舉區別工技悉精其
能堂與危坐無笑色聚書至數萬卷圖函
鼎彝鑿裁得源委而先處州遵奉誠令教

子晝夜不廢楸得以謏薄文藝叙升翰苑
幾二十年再爲集賢直學士今復超進爲
翰林侍講學士夙昔期望于遺言見之今
墓在桃源之西山王氏夫人合葬焉大父
諱似道字子淵曾祖諱皋累贈太保妣楊
氏越國夫人楊氏魯國夫人祖諱昇累贈
太師衛國公妣楊氏齊國夫人考諱韶少
傅同知樞密院事資政殿大學士累贈太
師越國公妣鄭氏周國夫人配王氏平江
府吳國縣龐菴先生份之四世孫蘇養直

向伯恭張安國朱元晦諸賢賦詩于其家
圃有詩集十卷行於世長子諱浚奉議郎
淮西制置司機宜文字八

皇元改授承務郎賓州同知娶史氏孫四
曰棟樛棟杪孫女十曾孫五彥毅亨端辛
孫女一先處州諱洪朝列大夫同知處州
路總管府事贈中奉大夫浙東道宣慰使
都元帥護軍會稽郡公娶史氏楊氏並追
封會稽郡夫人子楠爲嫡長孫女三曾孫
二瑾瑾女四人四世孫男曦曄女德秀袁

爲瑾聞姓晉政府由越公始至於大父承
緒展世不赫：以求高命所居堂曰拙逸
曰得閒殆見其雅志將以俟於後矣夫德
厚者報深恃報自逸必不能以顯郡公事
兄若父讓爵避財鄉黨至今能奮惴慄四
十年而教子篤切則曰我大父之訓我不
敢私今雖未底於成詩書之澤殆能以自
擇歲月逾邁交友故吏漸落幾盡隧碑有
缺幾於無傳是則有罪矧以不腆之文行
於南北庸述祖德刻於墓道俾子孫有考

恭定元年甲子

月

日孫具官桷表

先大夫行述

先大夫諱洪字季源姓素氏素為明州著
姓州陞為慶元宋仁宗朝詔外郡得籍開
封進士^舉嘉祐初為開封舉首者諱轂後通
判杭州蘇文忠公時為郡太守日論文史
典處州以終贈光祿大夫其宗諱穀亦占
籍開封試進士歷官至祥符縣丞因家焉
為公六世祖五世祖諱渭贈少保高祖諱
臯贈太保靖康難作隨青州兵復歸里積

善好施年八十餘預言死期別親黨沐浴
端坐以逝曾祖諱昇爲明州助教贈太師
衛國公樹德立早讓鄉里尊信郡有不軌
大獄命公揖治即其家搜驗得偽署籍姓
名一千餘人皆六縣大家不以送官立焚
之異行遺事世多所傳錄妣楊氏封太恭
人贈齊國夫人祖諱韶幼學于族父正獻
公燮登淳熙丁未第嘉泰禁道學自趙忠
定以下皆入黨正獻公遂廢
叙趙忠定公朱文公相次被召先後爲

侍從播紳榮之尹臨安十年神明愷悌自
辛弃疾揚王休馬大同正密以後推公次
之爲同知樞密院事以資政殿大學士銀
次青光祿大夫奉化郡開國公致仕贈太師
越國公妣陳氏吉國太夫人贈周國夫人
考諱似道中散大夫知嚴州總覈事物能
通達損益然不樂仕進守次江陰將行乞
祠祿以歸理宗異之贈中大夫妣王氏恭
人贈令人公嚴州次子七歲能諷誦詩書
左氏通大義以越公遺表恩奏補承務郎

年十七試吏部鎮監鎮江府大軍倉明年
道臨安馬光祖以樞密爲京尹上書往見
之馬公喜謂曰是故袁越公孫耶光祖治
京師皆先公條教今官位適相同然貴家
諸諸卽多不達文墨是書果子所作當由
以自近公謝不敏遂改辟監桃源酒庫檄
入帥幕時馬公號嚴敏客多畏避不敢進
率秉燭決諸曹事命四客坐四隅禁私語
夜分間以成案俾閱先後是否一日擇卷
牘繁冗者以試公：疏其要領言是事曲

直微有隱某官所檄微兩端馬公大喜日
以不決事委處分將俾微旁邑逋負公謝
曰初入官而以括責稱惧失先公遺訓馬
公謝之禮部尚書李公伯玉薦可治劇邑
中書舍人劉公震孫薦可理瘠縣馬公去
國改兩浙轉運司幹辦公事轉運使胡太
初刻峭善伺時相意旨公不樂之請歸里
胡亟怒以綠匣檄還司署曰不即來當議
劾公起視事或咎之乃慰曰太初先子先
樞密門下士知子能官固若是後潛說友

爲轉運檄督寧國絹十六萬疋公婉謝曰
嘉熙以來江東稅絹皆虛負寔籍寧國尤
甚莫^若悉蠲虛名止取景定至今逋且昔時
嘗以不能謝馬公矣說友惧蠲數廣亟命
他吏然卒不能辦爲禮部貢院彌封官甫
出院度宗忽降手札諭賈某曰舒津太學
名士袁洪嘉定名臣孫宜與陞擢差遣舒
同里人賈疑有內援遂除舒太常博士公
爲太社令就職兩月諷門下省論而舒亦
以他事去賈相嘗曰浙東唯溫處士可任

事四明士不宜用于時高公衡孫趙公汝
楫以戶部侍郎汪之林以汀州趙孟傳以
贛州合執政官至守倅凡六十餘人皆家
居月為一集約討論先哲言行不得議時
事由是公益得抽繹文獻深愛重自晦絕
不通京師書問賈相悉偵知之乃命主管
華州雲臺觀咸淳壬申遷通判建康府公
閱事敏決老吏不敢給慮獄旬容有偽楮
連坐二百餘人悉出之定議止誅其首帥
趙潛貴駭不親庶務僚屬上府謁不得入

率用紫袋取畫諾公坐賓次命吏白帥今
邊事益急惡少年掠奪市上將驕不習兵
非紫袋可奉行帥聞即延入閣出遜語且
曰將循視沿海諸屯壘苟可安便者無忌
也甲戌冬十有二月帥行郡中大驚爭移
徙出郭而村落民與故侯聯落者復入城
有約白晝罷市公詢扇亂者斬之戒門者
無納村民城中始安夜多火災有徼卒瞻
對詳練公私以白金立署賊曹一夕卒馳
報有成約以二鼓縱火南門劫門鑰以出

今賊俱在廟中治火具公遣卒往伺賊將
出廟門捕三人有緼火在手即斬以徇諸
將由城者皆故侯部落至是益蹇傲願習
射求官賞且曰在昔唯陳招捕習騎射今
不能復見此等相公矣翌日將巡城請公
乘騎吏擇馴馬以進公命取將馬來將異
之坐城上召諸將曰郡庫非制置使不敢
用若等求較射吾當以私財定高下語畢
入射將挾矢前喏曰願奉約束然不敢先
公手弓遂弦三發皆中葦一入的將謝不

敢公強之終不能並卒定其賞如初諸將
前曰惜侍郎官晚然事不可爲公嘿然侍
卽蓋淮江間幕府通稱也二月帥調精銳
居屯江城中羸卒數百相偶語有卒夜從
江滸還言趙制置已南遁數日將斛斛兵
還淮西搃領費伯恭奔軍資夜乘舟如通
州入海賈相師潰歸揚州諸將率故侯部
落將劫公出城公不得已微服間道歸臨
安見太常吳浚丞二舊為沿江叅議與公厚
善相對各泣下公曰國勢日蹙諸將率聞

風內叛浚薦丞相陳宜中公將留用之公願自効待罪急辭去趙公孟傳尹臨安奏爲浙西安撫使機宜文字不拜趙公制置慶元復奏爲沿海制置司叅議官公時已陞階朝奉郎亦不拜己亥冬臨安奉表降謝太后詔諭東浙諸如命戒毋徒以百姓汙鋒鏑時入南軍道上虞餘杭焚掠以行聲言留軍慶元備禦居無何王師將壓境公見趙制置言南軍已具海舟寔無意留旦夕必入城縱焚當先攻甬南門宜戒火

政分卒東城以居民未幾果縱火焚浮橋
劫江滸城有備不得入舟出定海以行制
置司政宣撫司復署為叅議人心危疑旁
郡邑相屯堡未散舊不快意於衣冠者爭
上變入爵叅議官陳允平素與王姓讎：
言新從福州杭海來見陳叅議為蘇書都
統約以九月乘風下慶元當出兵以迎又
言禮部尚書高衡孫而下三十餘人皆聯
署勸進時張元帥督師將征南命招討使

王世強圖補匄是公儒服立庭記見王辭

陳叅議與聰署書寔無有招討故為守官
寧知讎不為虛言王未應有戎服長髯者
將登階見公亟下拜持抱曰此吾袁侍郎
詣王前曰傳海舊為建康壕寨官承宣使
阮思聰與侍郎巡城議列木柵阮言城廣
不可守且木柵無所從得傳海答曰蔣山
左右巨木可取撤近郊居民屋高下附益
可立其使果欲守良無難阮故呂太尉姻
盛怒將以軍律抗對殺海袁侍郎悟旨急
叱海入獄明日杖海而遣之今不知侍郎

何故立庭下海願以身贖罪王大驚具賓
禮以迎且告元帥引問之故公言安反
側定新國當絕告訐羅織翌日元帥盛軍
容望府有告者復言奉化昌國某大家以
故王爲名一從台州黃岩來一從海上來
帥立叱去之陳叅議亦由是得脫郡大疫
善藥以施死者給棺以殯後戒以爲常行
之踰二十年至元十五年從趙公朝京師
覲世祖皇帝天語命班秩宜高從行者一
等將授德管以子幼辭乃授朝列大夫同

知邵武路提管府事以疾不赴至元二十年授温州路同知疾作復辭公幼從王先生鑑學問戒以躬行為持身本每授以言行編諸書公守而行之至是書陶靖節書詩顏氏家訓為一編以寄意至元丙戌歲侍御史程公奉詔徵士首寄生起公遜謝不敢當大德二年改授處州路同知命下而公已捐館寔是歲二月十八日享年五十有四先大夫性孝友事兄賓州如父器物田宅賓州所予者猶辭不敢受

嚴州遺澤二悉讓兄子淡嗜好自建康歸
即獨處清坐嘗曰綺縠聲色非潤身延年
佳物諸君何慕焉嘉賓客終歲無虛日客
去復具饌以俟不喜言人過或甚不能自
重者猶覆護言無事急施與家無長物嫁
娶喪葬有不能舉者悉賑與之愛博而內明
碩儒故官旁邑外郡俱館致教子弟嘗言
吾交游宜廣汎愛親仁勿為臧否可也有
客素依公調官京師願奉公文書以效勞
久之客得官羣議咎客公以書慰之君果

有得猶我之得客出書示議者乃止善尺
牘琴奕諸藝皆過人不自詫裸每言治名
激行爲之良易然不敢欺於心晚歲過郡
士神祠桷待行指謂曰吾言出諸口今得
視神無愧自丙子來冠屨雜揉抑負不自
振嘗開釋防漸而扶植之或利害不便必
正色廣論絕其萌蘖乃止歿之日鄉里無
貴賤老穉皆驚惋不絕塋在鄞縣桃源鄉
慈溪輿之源元配史氏太史丞相忠定史
越王浩之曾孫祖彌墜資政殿學士贈太

傳謚忠宣考賓之朝議大夫直敷文閣荆
湖轉運副史再娶楊氏世儒家五世入太
學景定壬戌太學進士太平州判官之女
以宋明堂恩贈安人男一楠史出女三長
適丞相史莊肅公嵩之孫似伯前將仕郎
次適公工部尚書余天任孫昌期前通仕
即次適資政殿大學士史巖之孫益伯前
承務郎孫男二璿璿孫女四長適同知餘
姚州事趙孟貫餘許嫁未行痛惟先大夫
言履歷：在人耳目早登撫仕將大有爲

迄不得展究尚義勇斷施止於州里而中
年泊然退靜莫有知其竟者不肖孤藐然
嗣承懼歲月之久失于傳貽將益負不孝
願托於立言大賢以求信於世謹述歷官
行事辱賜之銘而傳焉

先君子早承師友晚固艱貞習益
之訓傳於過庭述師友淵錄
王鏞濟南人侍御史伯庠曾孫由次翁始
居鄞敦厚寡言幼師之精理學多錄言行
教人不喜矯飾壬戌進士

張即之叅政孝伯子孝祥從子善為頌語
乾道淳熙事月日先後無異史官李心傳
嘗質之喜校書經史皆手定善本嚴州奉
祠日相遇從有潔疾語言清整待僮僕亦
然書蔽其名書法之壞自張始特加大中
大夫以壽終

趙汝楨善湘子為宰相婚早退自修精易
象有易叙叢書可傳官至戶部侍郎晚歲
以理財進用失士譽李伯玉鄱陽人為右
司論事得罪後為禮部尚書薦以政事可

作劇邑將入政府卒

馬光祖婺州人號吏部改署佐其府性過
急斷決無停滯一時新進效之鄉有馬元
演時爲仁和縣晨坐廨決事五百縣大治
改官奏舉皆出馬公後爲禮部尚書衢州
坐殺飢民罷

劉震孫東平人忠肅公元孫文清公之子
魏文靖公之壻爲喬丞相行簡樞屬喬相
與劉嘗言越公尹京政治晚爲宗正少卿
兼中書舍人知爲諸孫署剡曰嘉定名臣

某有孫敏材宜理瘠縣

胡太初天台人以清苦自檢治與處州季

鏞同其父越公門下士胡晚始自言事見

劉克莊所為銘

劉黻永嘉人左史出治慶元於時奉祠山

中以居鄉清修荐世號六士

汪之林里人龍圖閣學士大猷族孫為諸

王宮教授守汀州晚歲十年不通時相書

遠識樓宣猷公言出處大致不可易居同

里巷賀益甚卒

應文煒奉化縣人精文學年六十始入太
學蚤游江淮吳毅甫作相兄淵守建康不
去應作書諷之即謝事毅甫竒之招入相
府不願去史嵩之罷相猶子璟鄉上書或
言應為輔史相諷所屬掠治應益忿然卒
得脫癸酉歲襄陽降應言世事已去先子
官金陵戒毋携妻孥凡所言得失悉中
曹說侍講粹中曾孫父為山陽佐死難幼
絕葷娶精易象數論語書春秋皆有解多
折舊裏說歲一再至易說為里人所竊今

不傳聞在松江儒家

王先生應麟兄弟中博學宏詞科為翰林
學士禮部尚書咸淳詔冊辭命皆先生所
作著書有春秋考逸詩考古易考通鑑義
例考困學紀聞玉海一百卷文集一百卷
先子命楠受業十年
胡三省天台人寶祐進士賈相館之釋通
鑑三十年兵難藁三失乙酉歲留袁侍整
日手抄定注已丑寇作以書藏窖中得免

定注今在家

吳浚建昌人喜論兵爲建康叅議數凌侮
郡將賈相督師舟泊龍潭客謁不得入吳
大慟賈竒之後入爲王官教授累遷起居
舍人嘗荐先子於陳丞相入南起義兵事
不濟議降文丞相殺之

戴表元辛未進士善論策失仕歸里力從
諸先生能古文爲金陵同教授時與之同
官家貧衣食墓喪咸賙之後留塾中有翰
林集五十卷

黃震慈溪縣人以清介聞賈相知之守撫

州兼本路提點刑獄迄不能合坐論去性
不喜里鄉獨作書以所爲日抄一篇寄贈
陳蒙鄞縣人國子司業塤之子善筆札治
獄多探竒嘗疑之後爲淮西提領以浪用
帑罷貶建昌晚守溫州益詭誕子孫散亡
不可考

安劉汴人居鄞之小溪以詩義冠多士善
清言三歷祕丞卽官素爲賈相客安以科
目自持卒不能顯用

程鉅夫舊名文海鄞州人今居建昌善鑒

裁為侍御史時奉詔徵江南遺首薦先子
以疾辭所薦士皆知名多至大官今為翰
林學士承旨

謝昌元資州人淳祐甲辰別院第一守封
州提舉廣東常平幼歲見劉文節公先祖
能道蜀士大夫言行可傳錄言蜀中之事
甚恠僑居于鄞入朝為禮部尚書
青陽夢炎西蜀人使李璵善機辯賈相愛
之為荆湖提點刑獄仕元朝為吏部尚書

多智

白夢^夢炎三衢人事見國史晚為翰林承旨

焚香擇吉日荐先子於御史中丞翰林修撰汪漢卿與桷官翰林時言之

趙與票黃岩人萬寔無城府睦姻族與先子俱為史壻官京師歲一遣問官至翰林學士卒

盛夾金華人邃經學多本項安世民丞相王燾荐為太學博士後通判慶元

梅應發廣德人與叔祖履道同補太學為慶元教授習詞科卒不成官至太府卿喜

抄書先世書皆傳寫

舒岳祥台州寧海人七歲能古文弱冠謁
吳子良吏部大奇之吳學於陳者鄉舍人
舍人學於葉適正則以師道自任好訛侮
晚歲詩益工官慶元時與之游後作書俾
桷往事之

劉莊孫學于舒能文詞深沉善精思家貧
無書傳五經能點與先儒合病廢卒
樓栴宣猷公族孫精歷法言宗司天氣朔
盈虛當改章法不可用未之信後授時歷

頌言始驗館于賓州伯父家四十年日布
算疑多財者貧老卒

應黻孫叅知政事繼之子父爲翰林學士
時能代父書命後秘其父書不出好博以
盡死

史蒙卿乙丑進士拙程文默誦五經其學
喜竒說禮部尚書王公多傳授之卒以竒
不合於王公

陳定孫叅知政事卓之孫爲軍器監丞家
居四十年歲奉祭祀哭泣年八十餘乃終

余尚賓官至大府寺丞賈相入朝不得調
孝友誠實鄉里交賢之

謝翱南劍人僧圓志瑞州人俱能古文尚
嚴簡氣鬱不自舒困死

周密湖州人與陳厚韓翼甫李義甫山咸淳
初為運司同僚俱有吏才約貴日以自稱

禁近俗名號陳能文端明誠之弟韓安齋
孫善持守李豪邁名吏壽朋之孫皆蚤卒
周中丞祕曾孫晚歲以鑒賞游諸公微失

雅道

葛慶龍南康人寓居四明僧舍精唐律詩
酒酣能飛筆為數百言然弃不復錄

先夫人行述

嗚呼楠始生之日已不肖羅禍於先夫人
音容永隔無所容罪每侍先夫人嘗語曰
汝生之年歲大熱丙寅為火協於支干臨
安民居繁湫坐地沃水猶喘息不得止茵
席器案如執汝母體素弱一夕暴世輒不
可藥目光已離猶視汝在襍中復愀然曰
楠來前念至是曷時可忘耶楠泣而記之

又曰大父嚴州與汝外大父敷文公最相
好伏臘治具悉相似商確品目議論好惡
無不脗合汝祖母王令人史太師甥故于
敷文通姻好益密淳祐辛亥八月敷文病
瘳下嚴州日問疾敷文力疾言吾有二兒
二女皆未姻願以穉公幼子吾時年七歲
汝母年六歲是月嚴州治幣問名閱七日
敷文捐館嚴州歲時往撫敷文家撫汝母候
筭期以主我中饋又無祿嚴州即世景定
辛酉歸於我史號大門伯父賓州嚴峻汝

母屈意朝夕承候無替惰分至大祭盛服
俟廟門陳器荐牲饌低首偃立終日不少
動性潔靜無華色飾從母廣國夫人爲昭
化軍節度使謝公埜配貴家競侈異獨無
纖粟模效每一詣親黨歸悉脫去鈿屬嘗
言教兒嬰孩必早加訓整庶無爲父母羞
余年少時習騎射必正色切劇或從廳屏
偵問所與交有凡近者即掩被就睡明日
徐曰先丞相家無此客先夫人少母張夫
人所出張夫人生二女長適謝公先夫人

既卒謝公日迎張夫人張夫人不肯去泣
曰吾一甥外甥曷忍去卒撫字見桷有室
張夫人言外祖敷文方死時汝母望床泣
不置勸之食不食終日坐殯次不離服除
一詣庶母房至嫁日始再詣別之家入莫
有識其顏面者桷既長曷氏軍器監丞柳
州某言忠定越王淳熙中召赴德壽慶壽
班孝宗曲宴問曰太傅幼子今何姻忠定
謝不敢孝宗曰吾爲太傅成之是時宗獻
靖王伯圭女方笄即封新安郡主以嫁忠

忠宣是生敷文敷文長外家出宰武源縣
二滿始歸里敷文言吾祖暨外祖皆真太
師汝曹當謹對婚對今甥已克堪問學慎
毋忘外家敷文嘗言而母幼靜簡當有成
竟迄不享二年幸子在猶能慰吾意夫人
諱棣卿字景華以宗明堂恩追封安人謹按
史氏譜有舉八行者諱詒贈太師冀國公
為五世祖曾大父諱浩舊學相孝宗純誠
厚德歷三公以太師保寧軍節度使魏國
公致仕追封越王謚忠定妣貝氏封齊魏

國夫人伯祖諱彌遠相寧宗理宗太師中
書令祖考諱弥堅資政殿學士光祿大夫
奉化郡開國公致仕贈太傅杜歲尹臨汝
帥湖南多異政中令為相歷年滋多太傅
不復肯仕家居十餘年端平改元謚忠宣
妣趙氏新安郡主封魏國夫人考諱賓之
朝議大夫直敷文閣荆湖北路轉運副使
少事丘文定公密以政事稱六為郡太守
贈通奉大夫妣王氏恭人丞相忠定魯公
淮之孫妣葉氏恭人俱贈碩人丙寅歲冬

十一月塋於鄞縣通遠鄉建與之原卒時
年二十一後三十有三年先處州不祿懼
體魄之不寧遂別塋于桃源鄉慈溪與之
源先處州講洪朝列大夫同知處州路提
管府事曾祖諱昇贈太師衛國公祖諱韶
同知樞密院事資政殿大學士銀青光祿
大夫奉化郡公致仕贈太師越國公父諱
似道朝議大夫知嚴州贈中大夫男一人
楠女三人長適丞相莊肅史公嵩之孫侶
伯前將仕郎次適工書部尚書余天任孫

昌期前通仕郎先大夫晚得女一人適資
政殿大學士史岩之孫益伯前承務郎孫
男二瑾瑾孫女四長適同知餘姚州事趙
孟貫餘許嫁未行私念楠孤苦不自振擢
揆厥有生與先夫違异之日俱積今宰木
已抱過庭之訓懼無以貽子孫敢求偉于
文詞叙而銘之庶得以永傳考而有傳焉

亡妻鄭氏事狀

亡妻諱某姓鄭氏鄭爲明州令族世家於
鄞始自元祐舉進士至宣和時其孫入辟

雍有諱某者當孝宗時爲郎曹守平江寢
著至太史尚書令忠定魏郡王諱清之以
舊學相理宗官簿益盛故君之七世祖至
高祖皆贈太師魯國公魯公長子冲之某
國學進士贈中大夫妣邊氏封太碩人魯
公配莊碩人素嚴忠定之孫出夫人將不舉
邊氏急詣姑取保乳之長歸于其姑後碩
人生子諱次申某與忠定同登嘉定丁丑
進士第邊碩人卒忠定為之服衰以報其
子亦官至中大夫祕書監寶謨閣待制以

終于君為祖贈奉大夫妣汪氏奉太碩人
待制生子諱大原某朝請大夫直祕閣主
管建昌軍仙都觀于君為妣汪氏封宜
人淳祐中忠定以師臣再相年益高祕閣
入閣承侍裨贊可否務摠約倂要纖杪不
以類于時賈相帥荆湖數張皇運軍旅邀
國用朝廷抑不下賈相恨議由公出辛亥
歲丞相薨庚申賈入相由是積二十有三
年不復出任先處州由大社令奉祠里居
祕閣公多能言臺閣舊事數往還是時祕

閣新喪子無他嗣庚午歲乃得君客至嘗
抱立左右錦襦珠髻注目不聽去處州戲
曰他日願以爲子婦祕閣愀然若有屬癸
酉歲處州通判建康府將之官宜人與祕
閣餞飲于中堂共指桷曰誠宜爲吾婿是
歲祕閣與宜人俱捐館居第在城東門外
乙亥兵難作先處州以其遺言謀于其宗
始歸于我于時袁宗猶完盛先廟祭祀娣
姒林立能早順盡禮朔望承問無缺怠事
桷外祖母張夫人甘柔涼燠調適以宜張

夫人嚴整語相家內儀和珍組絲皆精巧
有度君能耳受目悟而敬成之張夫人病
草視藥膳連日不入寢處嘗曰新婦不獲
事先始得事夫人斯可矣性靜厚寡言笑
遇事不輒發而是否瞭然不能易故處親
黨無間言處州幼撫如已女君傾顏色承
事幾二十年絕纖粟忤意已丑城中災遺
物散燬先處州以他事往吳杭間意忽
不樂間治觴其能使平盛時祕閣所後子
不自振君深憂之竊從招題命所子歲時

以祀其先大德戊戌歲正月君產女病營
弱楠主史甥姻于杭二月十日丁卯亟歸
視之則已無及矣大禍仍構又八日而我
先處州亦捐館舍噫念昔少時私欲奮勵
學問以自振植先處州愛之乃悉提攬酌
酢俾以不亂其心不幸志昏能薄一無所
成立四女二男皆君所出紉箴訓飭復能
相其夫使有斲不知及今一十有七年從
宦京師藐然孤身若忘其家缺內佐之助
靡密綜錯日以加多而學益以落文誠不

能以表君之志敢求于故家之友人精於
言詞者誌而銘之君塋在鄞縣桃源潘輿
之原男瑾次瑾女一嫁餘姚州同知趙孟
貫餘許嫁未行楠今為翰林待制是為先
樞密太師越公諱韶之弟四曾孫先嚴州
中大夫諱似道之嫡孫先處州朝列大夫
諱洪之孤子也

外祖母張氏墓誌

外祖母張氏諱致和湖州德清人嘉定六
年七月生父某事趙崇憲靖王父子再世

部樂伎年七歲通音律相曾外祖母新安
郡主歸宗王家見而愛之載以歸俾事外
祖敷文轉運使公稍長爲侍姬戶室靡密
摠覈合繩墨外祖性嚴急絜長覆短使不
有忤意囊篋甲乙隨旨諭立陳于前如是
踰三十年生二女長和政郡夫人嫁大尉
昭化軍節度使謝楚次次即先妣會稽郡
夫人歸於我先考諱洪朝列大夫處州路
同知摠管府事二女皆嫁宰輔家于時謝
以后族貴顯先處州官臨安常早讓疏之

外祖母雖久居相門見謝壻侈靡踰限制
心不樂而多田處州以靜恬自怡咸淳二
年丙寅夏六月會稽夫人寔生桷甫七日
洞下遽卒又未幾先處州病大熱垂死咸
言不利於母將及父謝公願取已育之處
州在病搖手不許外祖母排斥詬詈戶之
遂日訓飭調適且祝曰兒宜爲史氏外公
自重八年謝公死泣曰吾固審若是吾盡
力撫素氏外甥他何之訖見桷娶婦生女
至元二十四年日年七十有五葬於先

夫人之墓左五十武幼通書算善心計處
州事有未及始諷之終以舊事敷文者言
之晚歲病瞽纒二有外家事曰汝外曾祖
太傅忠宣公居東湖滄州十有四年作書
諫兄忠猷辭相位不輟歲賜生日器幣辭
一再始受後數年不復受鄭忠定丞相忠
宣公整師也敷文受學焉其舊第前爲舊
學壽星書後爲授經鄭相書皆有深旨又
曰音樂慎勿畜今世公鄉女樂皆俚野不
足聽唯太傅壻趙宗王悉祖樂髓景祐譜

八十四穿心相通嘗曰譜與易合吾不知
易何圖可合汝識之又曰丁抗掣曳大住
小住為喉舌綱領法曲散序忠宣刑正之
曲有鈞猶韻也纍纍貫珠韻不絕也聲有
盡拍以度非句斷也于時周待制邦彥孫
璫于太傅為中外表太師越忠定王嘗令
補清真詞手筆具在今付汝雖不解慎勿
墜舊以恩賜紅霞帔再封孺人記曰庶母
不祀於孫而復曰祔于庶祖姑古不墓祭
昔之大賢嘗慙然矣今夫禮緣于情而義

以制者惧後世昵于私者之過也先王營
正壘之大小無貴賤慎其始不幸有沮如
崩齧之患焉其修之也必以道是則於吾
外祖母非有過者矣以孤兒傳處州考其
所自曰外祖母保鞠之恩重楠二子瑾瑾
將疎然以加厚外祖母有田若干足以治
墳壘奉春秋列于碑陰懼瑾瑾之子若孫
滅其情義必曰禮有所不載遂具昔之訓
撫行事立石於墓俾勿墜某年某月某日
外孫具官袁楠謹誌

清容居士集卷第三十三終



